

Philipp Wespi

Stadtrat Ressort Finanzen, Vorstandsmitglied

Römerweg 10

8307 Effretikon



Jungliberale Illnau-Effretikon

1. August Rede 2010

gehalten an der offiziellen Bundesfeier von Illnau-Effretikon, im Grausel, Oberillnau

Es gilt das gesprochene Wort.

Liebi Iwohnerinne und Iwohner vo Illnau-Effretike,
Verehrti Gescht,

Händ Sie sich au scho mal überleit, was de Schlüssel vo eusem Erfolg isch? Wieso mir Friede, Wohlstand und Demokratie händ?

Jedi und Jede hät sini eigeni Antwort. Aber für mich git's vor allem eini: Wil mir ali da d'Schwiz du dem mached, was sie hüt isch. Mir ziend zäme a eim Strick! Churz zeit: Euses Land, eusi Schwiz, eusi Eidgenossenschaft isch genau eso stark, wie'd Bewohnerinne und Bewohner sind, wo da läbed.

De 1. August ladt eus ih zum Denke und Hintersinne. Zum Überlege, was eusi Schwiiz prägt, was eus als Nation stark macht. Danke, dass ich die Überlegige hüt dörf vor und mit Ihne mache. Es isch mir e grossi Ehr.

Liebi Awesendi,

Eus gaht's hüt guet. Mir gnüssed d'Frücht vo de Saat wo'd Generatione vor eus gsäht händ: Sicherheit und funktionierendi Sozialsystem. Direkti Demokratie wie sie susch käs zweits Land kännt. Stabili Priise, relativ höchi Löhn und en grosse Wohlstand. Ales Eigeschafte wo d'Schwiz hüt beschribed. Dadefür sind mir ali dankbar. Isch das für immer? Was chönd und müend mir biträge, das es eus und eusem Land au zuekünftig eso gaht?

Da git's für mich zwei Antworte. Über die zwei Antworte möcht ich i dere 1.-August-Red luut nahdenke.

Also, das es eus und eusem Land au zuekünftig guet gaht hät erschtens mit eusere eigene Istelig, mit de Sichtwiis vo jedem einzelne z'tue. Zweitens bedüted's azpacke und z'chrampfe.

Eigeni Istelig/Sichtwiis

Es paar Gedanke, was ich meine mit de eigne Istelig, eusere Sichtwiis.

Liebi Mitbürgerin und Mitbürger,
 eus gaht's nöd besser, wenn mir ales eso lönd, wie's hüt isch. Mir chönd nöd hoffe, das d'Sache womir schetzed immer eso bliibed, wän mir nöd bereit sind zwüsched dure mal Innezhalte zum Hintersinne. Vo Ziit zu Ziit de eigeni Standpunkt hinterfröged und wo nötig apassed. Mir chönd nur witerhin erfolgrich i'd Zuekunft schrite, wänn mir de Muet händ zum eus z'entwickle. Am Stammtisch oder im Kollegechreis d'Fust im Sack mache und sich drüber ufrege was nöd lauft oder was schlächt isch – das langed nöd. Nöd chlöne – mir müend ändere! Sache und Entwicklige wo eus nöd passed dörfed mir nöd stillschwigend akzeptiere. Sondern mir müend aktiv dezue biträge die z'verbessere. Das isch ja s'guete a eusem System, mir chönd eus ibringe. Niemert uf de Welt chan das so eifach und direkt wie mir i de Schwiz. Mir sind also nöd dezue igänggt, d'Fust im Sack z'mache, wie das di meiste Mensche uf dere Welt sind, sondern chönd mit eusem Isatz ändere was eus nöd passt und uf de Tisch bringe, was diskutiert werde mues.

Entwicklig und Fortschritt erreached mir nur mit Geistesblitz und neue Idee. Idee us eusem Privatlebe, Gschäftslebe oder au us de Politwelt. Idee und spontani Gedanke wo jede da kännt und sicher ab und zue emal hät. Egal us welem Bereich sone Idee isch: Es langed nöd zum merke, das öpis nöd lauft. Es isch wichtig, das mir eus überleged, wie öpis besser chan gmacht werde und das gad umsetzed. S'Heft eso i di eigene Händ nähmed. Idee und i dem mir die gad apacked: Das bringt eus wiiter! Us em Engagement entstaht Entwicklig und Bewegig. Neui Idee füered zu witere Idee und so entstaht e positivi ufwärts Spirale. E Spirale wo eus au i de Zuekunft als Land stark macht. D'Pionier vo hüt präged d'Schwiz vo de Zuekunft. Oder churz zeit: Euses Land brucht kei Unterlasser, sondern Unternehmer! Mensche wo apacked und umsetzed, egal i welem Umfang. Es wachst im Chline und hört bim Grosse uf. Hauptsach Engagement!

Apacke und Chrampfe

Verehrti Ideegeberin und Umsetzer,
 Zum zweite Gedanke, zur Frag was es brucht, das es eus und eusem Land au zuekünftig guet gaht. Es isch apacke und chrampfe! Was usschlaggebend für'd Zuekunft vo eusem Land wird si, isch das, was mir ali da bereit sind zum für eus und eusi Gsellschaft z'leiste. Es brucht jedi und jede i eusem Land, ali da uf Platz. Wie? I däm mir euse Bitrag as zämelebe, a eusi Bevölkerig leisted. Seg das im Chline oder im Grosse. Wän mir gmeinsam apacked sind mir stärker. Dademit wil ich nöd sege, das mir ali i einere Reihe stah müend und Sandseck für d'Gsellschaft bige müend. Das isch nöd d'Meinig. Schliessli sind mir sind ales Individue mit eigene Stärke und Schwäche. Eusi Role i de Gsellschaft isch drum viel ehner vergleichbar mit eme Mosaikstei im Kunstwerk Schwiz. So chönd mir euse Bitrag verstah. Öb mir en chline oder grosse, en eggige oder runde Mosaikstei sind, spielt überhaupt kei Rolle. Hauptsach euse Stei glänzt und strahlt und macht das Bild au wüerkli zumene Kunstwerk. Das isch das was ich meine mit eme Bitrag as Zämelebe leiste. Drum säg ich: Egoismus isch vo geschter, apacke für'd Gsellschaft isch d'Zuekunft!

Jensti Verein, Organisatione oder au e hilfsbedürftigi Person warted uf eusi Mithilf. Uf eusi Unterstützig und gschetzte Bitrag. Seg das inere Jugendorganisation, bi de Altepfleg, im Natur- und Umweltschutz, i de Fүүrwehr, oder im Verein. Oder au i dem mir amene chranke Nachbar go poschte gönd, für e Bekannti d'Chind hüeted, oder im tägliche Lebe Zivil-Courage zeiged und eus notfalls auf für en Fremde isetzed. Mir ali händ e Verantwortig gegenüber eusne Mitmensche, gegenüber eusere Gsellschaft, gegenüber eusem Land!

Verehrti Apackerinne und Apacker,

Wän mir dankbar und stolz sind für das, was mir hüt da und jetzt händ, dän isch jedi und jede da au verpflichtet zu dem bizträge. Mir ali chönd das i irgend äre Form. Mir müend nur wele und s'dänn vor allem au mache. Jede vo eus isch en Mosaikstei. Wän mir das eso läbed und umsetzed, so blibt's wie's isch und cha's i de Zuekunft blibe wie's isch.

Schluss

Gschetztzi Zuehörerinne und Zuehörer,

Ich chume zum Schluss vo mine Gedanke. Am Afang händ mir eus gfröged, was de Schlüssel vo eusem Erfolg isch. Ei Antwort isch xi, das mir ali a eim Strick ziend!

Liebi Seilzieherinne und Seilzieher da a dere schöne 1. August Fiir,

Am Geburtstag vo eusere Schwiz, eusere Eidgenosseschaft han ich vor alem ei Botschaft: Eusi Schwiz isch es grossartigs Land! Si isch de besti Fleck Erde wo's git. Dass das au i de Zuekunft so blibt brucht's d'Chraft, d'Idee und d'Initiative vo jedere und jedem under eus!

Das bringt eus vorwärts. Das macht eus stark.

Mit Freud, Energie und Lideschaft!

Für mich, dich und eus!